

### 【剃頭】張美容

前幾日仔去剃頭店剃頭，看著一個兩、三歲个細人仔，為著剃頭噉到噉惶殺天<sup>1</sup>，大人細子全部都搥到汗流脈絡，實在還衰過哪。佢這下較大咗，剃頭該下毋敢噉，毋過還係恁驚剃頭，乜共樣恁惱剃頭！

佢驚剃頭，係因為佢當無膽，驚師傅手項該支剪刀摺剃頭刀。見擺一坐落凳頂，圍好剃頭帕，看著師傅擎等剪刀對等佢，佢就開始怵怵掣<sup>2</sup>，試著過忒千年恁久頭那毛正剪好，正想愛畀一下大氣定定，師傅又擎等利利个剃頭刀愛來刮吾腦之背<sup>3</sup>个毛腳，這下還較得人畏哩。佢驚到頸根緊跣、屎肱在凳頂扭來扭去，師傅緊刮緊咄<sup>4</sup>佢毋好停動，無奈何，佢牙根齧等、拳頭嫫搭等，由在人剗割。係走得，佢定著起腳滑走<sup>5</sup>，一分鐘就毋停跔。唉！剃頭實在得人驚！

1. 噉惶殺天：音 ve' vong' sad' tien'；高聲呼叫。

2. 怵怵掣：音 bid bid cad'；不停發抖。

3. 腦之背：音 no' zii' boi；後腦杓。

4. 咄：音 doi'；喝斥。

5. 起腳滑走：音 hi' giog' vad zeu'；拔腿就跑。

到三、四年生起勢，膽較在<sup>6</sup>哩，無恁驚剃頭，噉變做惱剃頭，因為師傅該張嘴當得人惱，佢總係在摺佢剃頭該時節，講講擎一千擔有个無

个。可能大家係老鄰舍倘<sup>7</sup>熟事咗，佢長透緊剃緊同佢打嘴鼓，一下仔問：

「若頭那毛落麼个肥，仰會生到恁靚、恁多？」一下仔又講：「營養毋好專門搗到頭那毛去，愛食較高大大兜仔正有影哪！毋好像矮嫫車樣仔矮伢伢仔<sup>8</sup>。」佢面皮薄、驚見笑，長間目珠眨等詐無聽著，一肚懊惱<sup>9</sup>想：「仰結煞！脣頭个人定著在該笑佢咗啦！還惱！還惱！實在還惱剃頭。」

最冤枉个係，有一擺師傅毋知仰仔，剪刀一溜<sup>10</sup>，噉摺吾个耳公剪溜皮，跔等就出血。師傅緊同佢膏藥仔，緊嘍嘍嘍講：「頭那毛恁多，當毋好剪。」仰形噉變做佢毋著！轉到屋下想愛同阿姆做嬌，無想著阿姆毋單淨無安慰佢，顛倒罵佢講：「毋恬恬坐等分人剃哪！耳公無分人剪忒就異好哩。」限勢佢愛噉毋得嘴扁，聽著阿姆恁樣講，黏時「哇」一聲噉出來。係做得，佢甘願鬢頭絞髻<sup>11</sup>乜無愛去剃頭。

剃頭个齣事，幾隻月就愛再過來一擺，還艱苦哪！佢日日想、日日望，想望煞煞

大，做得像

大人恁樣，去電毛店剪頭那毛，腳交等，有冷氣好吹、有人同你捉龍，還有人烹茶分你食，毋知幾好哪！

6. 在：音 cai；穩固。

7. 倘：音 tiong'；太。

8. 矮伢伢仔：音 ai' dud' dud' e'；矮嘟嘟的。

9. 懊惱：音 au nau；懊惱。

10. 溜：音 tiu；滑開。

11. 鬢頭絞髻：音 nung' teu' gau' gi；蓬頭散髮。